

明

史

明史卷二十一

本紀二十一

光宗

光宗諱常洛神宗長子也母曰恭妃王氏時中宮孝端皇后無子而貴妃鄭氏最有寵王氏宮人也進御有身神宗初諱之既而奉慈聖皇太后命冊爲恭妃萬曆十年八月十一日帝生神宗御皇極殿受賀遣宮祭告郊廟社稷頒詔天下躬上兩宮徽號當是時神宗春秋鼎盛宮闈蕭穆故元嗣誕生敷恩海內國本之建已默定于此矣未幾貴妃生子常洵即進封皇貴妃而帝母不益封廷臣之疑遂起會大學士申

時行等以冊立請神宗諭以元子嬰弱冊封少待再
請再諭如前禮部尚書沈鯉請加封恭妃不報給事
中姜應麟吏部員外郎沈璟疏再上謫降有差給事
中楊廷相等論救神宗怒曰立儲以長幼爲序祖宗
家法朕豈有私焉國本有歸待期舉行毋得瀆擾慈
聖聞之弗善也神宗入侍慈聖問何以久羈冊立對
曰以彼都人子耳慈聖怒曰爾固非都人子邪蓋內
廷呼宮人爲都人慈聖亦由宮人進御也神宗惶恐
伏地請罪論者謂立長之議雖羣臣力爭亦慈聖堅
持之助云十五年丁亥閣臣請建儲封王並舉不報

十八年庚寅召閣臣于毓德宮時行等再申前請復
諭如前既而兩京九卿科道合疏上請皆不報已又
嚴諭閣臣大學士王家屏在直附奏且具疏再上神
宗諭以明年春夏科道官不來瀆奏便於冬冊立已
而寂然明年辛卯秋工部言大禮儀物未備神宗復
改之來年閣臣爭之嚴旨詰責時首輔時行以病在
告給事中羅大紘中書舍人黃正賓連疏劾時行並
削籍且下正賓詔獄廷杖百時行遂去大學士許國
亦去又明年壬辰給事中李獻可等請預教謫官奪
俸申救者皆獲重譴家屏疏五上以去就決爭並不

聽家屏亦去明年癸巳王錫爵赴召入京疏請冊立
神宗意主並封三王錫爵恐過激徒與上忤姑擬兩
諭以進朝論大譁攻錫爵者無虛日神宗怒戍光祿
寺丞朱維京給事中王如堅削光祿卿涂杰寺丞王
學曾籍而給事中史孟麟即中于孔兼主事張納陞
等謫降有差錫爵內悔以三誤自劾事乃寢時先後
閣臣力爭冊立者惟王家屏沈鯉自申時行王錫爵
沈一貫李廷機等皆意主調停俟其轉悟是以中外
水火之勢成矣未幾詔來春先行出閣讀書禮明年
甲午帝出御講筵儀度閑雅舉止凝重儒臣進說經

史虛心採納衆益歸心焉二十九年辛丑移居慈慶宮十月己卯立爲皇太子明年壬寅二月冊皇太子妃郭氏未幾神宗偶疾召閣臣沈一貫等諭以輔東宮爲賢君及罷礦稅起廢官諸事一貫承旨出翼日神宗疾瘳事復寢明年癸卯有投匿名書于各署者語涉坤翊宮及閣臣一貫等東廠緝獲以爲妖書上之神宗震怒大行捕逮株連者甚衆後鞫得皦生光磔之獄乃解是時神宗躬謁慈聖召帝見于啓祥宮賜手書慰諭相向垂涕蓋帝憂虞震恐神宗亦未嘗不悉知也三十三年乙巳十一月帝第一子生是爲

熹宗慈皇帝母選侍王氏明年丙午上慈聖皇太后
徽號冊恭妃爲皇貴妃選侍爲才人三十八年庚戌
十二月帝第五子生是爲莊烈愍皇帝母選侍劉氏
四十年壬子皇貴妃王氏薨明年癸丑帝妃郭氏薨
當是時福王常洵猶未之國六月奸人王曰乾上變
告孔學等爲巫蠱術將謀不利于東宮語連鄭貴妃
與福王神宗震怒左右皆辟易莫敢近已而閣臣葉
向高進密揭謂事宜靜處怒始解又密請定福王之
國期以安人心神宗是之明年甲寅福王乃之國河
南又明年乙卯五月復有梃擊東宮之事初帝雖移

居慈慶宮侍衛鮮少內奄往往求去守殿門者不過數人毫矣五月辛酉一妾男子持梃入宮傷門者突至殿簷下超級而上內侍羣執之帝急請于神宗以屬吏御史劉廷元訊治之男子名張差薊人也負薪爲業薪燬得狂易疾廷元希內旨以風癲蔽獄而提牢主事王之案不平重加鞫問書獄詞甚具語連坤翔宮內璫龐保劉成等獻上貴妃懼疏留中不下戶部郎中陸大受給事中何士晉太常少卿史孟麟各疏爭神宗爲心動時慈聖已崩神宗率帝及皇長孫等詣慈寧宮行告慰禮召見羣臣于宮門命帝代諭

之曰爾等毋信流言爲不忠之臣使我爲不孝之子
神宗悅又諭速結差獄于是禮部侍郎何宗彥刑部
侍郎張門達等再請詳鞫皆不報而廷元挾制羣臣
共持風癩之議第誅張差于市斃龐保劉成于內廷
而大奸漏脫矣四十八年庚申七月丙申神宗崩帝
監國遵遺詔發帑金一百萬兩犒邊撤回監稅內璫
盡罷天下礦稅戊戌改黃克纘爲刑部尚書張問達
爲左都御史起用建言得罪及學國本礦稅誅誤諸
臣己亥再發帑金一百萬兩克邊賞辛丑熱審慮囚
甲辰獎諭遼東經畧熊廷弼乙巳復駙馬都尉王昺

官八月丙午朔即皇帝位大赦天下改明年爲泰昌
元年蠲直省被災租賦停江南應徵段疋物料增設
海運兵備副使戊申詔建皇極門殿發帑金一百萬
兩給工陞王佐爲工部尚書起汪應蛟爲南京戶部
尚書己酉造曆遣官代祭太社太稷命史繼偕沈淮
爲禮部尚書兼東閣大學士並入閣預機務起朱國
祚爲南京禮部尚書禮部署部事侍郎孫如游給事
中楊漣請冊立東宮允之召鄒元標馮從吾王德完
孟養浩等至京吏科給事中周朝瑞獻慎初三要謫
外詔議聖母皇貴妃祔葬事宜癸丑朝鮮來貢甲寅

陞王紀爲戶部尚書總督倉場改許弘綱爲兵部尚書協理戎政釋建言宗室充餉于高牆連東大旱乙卯帝不豫丁巳文華門視事命整肅朝儀庚申蘭州黃河清凡三日辛酉帝不視朝大學士方從哲請皇長子移居慈慶宮御史鄭宗周上保護聖躬疏皆不報壬戌罷成國公朱純臣西寧侯宋光夏甲子詔議皇嫡母孝端皇后生母皇貴妃謚號命何宗彥劉一燝韓爌爲禮部尚書兼東閣大學士並入閣預機務改封瑞王荊州桂王衡州己丑命朱國祚爲禮部尚書兼東閣大學士入閣預機務召舊輔葉向高于家

遣官恤刑陞孫如游爲禮部尚書衛一鳳爲南京兵部尚書丙寅帝不豫丁卯詔議元妃郭氏才人王氏謚號戊辰命皇長子出見羣臣改金復道駐鎮江銀定歹青犯甘肅却之兵科給事中楊連疏劾崔文昇請皇長子入侍無離左右報聞辛未帝病彌留召大學士方從哲劉一燝韓爌英國公張惟賢尚書周嘉謨李汝華孫如游黃嘉善黃克纘左都御史張問達給事中范濟世楊連御史顧慥于乾清宮理漣疏中前諸命皇長子代諭羣臣甲戌疾大漸復召從哲等十三人受顧命輔元子各賜銀幣有差是日鴻臚寺

官李可灼進紅丸首輔方從哲不問翼日帝崩于乾
清宮在位一月壽三十九後從廷臣議改萬曆四十
八年丙午朔爲泰昌元年十月上尊號曰崇天契道
英睿恭純憲文景武淵仁懿孝貞皇帝葬慶陵

論曰帝久在青宮憂患何如其至而能委曲安全恩
義罔缺君子以爲難乃即位一月而升遐宮闈多故
動見危疑外廷復激烈紛爭遂成杞梓之釁吁可悲
也已

明史卷二十二

本紀二十二

熹宗

熹宗諱由校光宗第一子也生於萬曆三十三年乙巳十一月十四日母選侍王氏是爲孝和皇太后神宗以元孫生詔告天下萬曆四十八年九月朔乙亥光宗崩遺詔皇長子嗣皇帝位諸臣哭臨畢請見皇長子選侍李氏踞乾清宮要封皇貴妃不令出良久出御寢門諸大臣擁至文華殿叩慰畢請即位不許諭禮部具儀注以聞大學士劉一燝奏曰今乾清未淨殿下暫居慈慶宮吏部尚書周嘉謨奏曰殿下今

日之身社稷神人所託重不可輕易即詣乾清哭臨
俟臣等至始發帝首肯兵科給事中楊漣語內侍王
安曰外事緩急在諸大臣調護聖躬是內臣事安首
任之諭大臣率欽天監相視山陵首輔方從哲擬旨
賞李可灼金幣是日帝居慈慶宮丙子頒大行遺詔
丁丑大臣請選侍移宮戊寅御史王安舜特糾李可
灼擅進紅丸之罪改旨奪俸一年御史左光斗請肅
清宮禁鄭宗周請誅崔文昇從哲擬旨下司禮監查
勘己卯選侍未有移宮期從哲欲緩之楊漣力爭即
日移仁壽殿內奄李進忠劉遜劉進忠劉朝劉尚禮

姚進忠王永福鄭穩山等盜乾清珠寶下詔獄庚辰
帝即位于皇極殿以明年爲天啓元年自八月至十
二月稱泰昌元年大赦天下壬午給事中惠世揚劾
方從哲十六罪追尊光宗元妃郭氏才人王氏爲皇
后議謚癸未御史張潑疏論盜寶大璫盡係鄭貴妃
李選侍私人袁化中再糾從哲誤國之罪甲申上皇
祖大行皇帝尊謚賞賚慈慶宮扈從諸臣命戶部設
專理新餉官給關防丁亥上皇祖妣孝端皇后溫肅
皇貴妃尊謚頒詔天下允禮臣請開經筵給互市沙
什台吉冠帶己丑上大行皇帝尊謚庚寅設督運糧

餉官命太監李實織造浙江逮遼東總兵官李如柏
李如楨如栢自縊辛卯給事中楊漣劾兵部尚書黃
嘉善一籌莫展宜加誅斥癸巳蘭州黃河清江西大
水甲午廕太監魏進忠兄釗錦衣衛正千戶封乳婦
客氏爲奉聖夫人官其子侯國興爲錦衣衛正千戶
丁酉發帑金修慶陵戊戌收淨身男子三千人御史
賈繼春進安選侍揭己亥赤氣映天如赭良久乃散
御史左光斗疏陳移宮之由請安選侍庚子諭戶部
撫恤災傷地方辛丑諭內閣曰朕昔幼冲皇考選侍
李氏恃寵驕恣氣毆聖母以致懷憤感疾崩逝朕寬

莫伸惟抱終天之痛皇考大漸閣部諸臣入內問安
選侍威挾朕躬傳封皇后用手推朕向大臣覲顏口
傳至今含報因避其毒暫居慈慶李氏又使李進忠
劉遜等傳每日章奏先奏聞李氏方與朕覽仍思即
日垂簾聽政處分御史左光斗他日必爲武氏之語
朕思祖宗家法甚嚴從來有此規制否朕今奉養于
臧鸞宮仰遵皇考遺愛凡爾外廷誤聽李黨之浮言
未悉朕心之厚也李進忠田詔等盜庫情真自干憲
典豈謂株連卿可傳示部院遵行遼東經畧熊廷弼
解任聽勘壬寅黃嘉善罷冬十月丙午葬神宗孝端

皇后于定陵孝靖皇后遷祔賑江北水災官客氏弟
客光先爲錦衣衛正千戶丁未以袁應泰爲兵部右
侍郎兼右僉都御史經畧遼東丙辰祧英宗神主丁
巳賞九邊軍士己未祔神宗及孝端皇后于太廟允
禮臣請選大婚庚申以孫如游爲禮部尚書兼東閣
大學士入閣預機務辛酉帝御經筵甲子御史賈繼
春等以如游中旨入閣非故事請收回成命不聽獨
雲南貢金二千兩以崔景榮爲兵部尚書丁卯賊鸞
宮災戊辰命大臣公舉風力科臣勘遼東功罪癸酉
發帑金一百八十萬兩犒邊十一月丙子上恭靖郭

元妃昭肅王才人尊諡丁丑撤回天津採取銀魚內
官勅內監選后及妃嬪壬午王永福劉進忠鄭穩山
劉尚禮姜昇劉遜棄市盧相趙進忠成邊甲申免畿
輔加派一年命朱童蒙往遼東會勘熊廷弼功罪乙
酉諭大臣言官務協恭盡職以全國體命撫按官嚴
覈驛遞戊子發京營選鋒三千戍石塘堡癸卯給事
中周朝瑞特糾賈繼春十二月戊申御史方震孺疏
述三朝艱危帝是之乙卯詔曰朕冲齡御極內外清
平不意外廷邇來輕聽訛傳釀成實事不得不申諭
避宮始末以釋羣疑九月初一日皇考賓天閣部文

武等官哭臨畢請朝見朕李選侍將朕阻于暖閣司
禮官固請方許朕至乾清宮選侍又差人數次請回
不令御文華殿卿等親見當時景象安乎危乎當避
乎不當避乎初二日朕送皇考梓宮于仁智殿行禮
未畢邀朕再行朝見方許回慈慶宮扈從大臣所親
見明是威挾朕躬垂簾聽政之意選侍毆崩聖母自
知有罪使宮人王壽花等時來探朕不許朕與聖母
宮官一言此朕苦衷外廷不能盡知朕是以故停封
號以慰聖母在天之靈奉養優厚敬遵皇考遺愛該
部亦可仰體朕心矣大小臣工惟知私于李黨責備

朕躬不顧大義故特諭卿等知之方從哲罷庚申以
周應賓爲南京禮部尚書丙寅錄宋儒張載十四世
孫文運爲奉祀給冠帶己巳命立武學于直省郡縣
天啓元年春正月癸酉朔大風雪己卯發帑金五十
萬兩充遼餉辛巳都給事楊漣乞歸允之甲申帝御
文華殿講讀乙酉詔選淨身男子一千五百人入宮
丙戌土星逆犯井宿庚寅

大清兵攻撫順破二十餘屯壬辰逮寧夏總兵官王如
金甲午帝行冠禮御史方震孺言人心不平者三一
國本之爭二門戶之說三移宮之事請旨召對不允

乙未賜瑞王桂王惠王莊田戊戌復增收淨身男子
二百人辛丑發帑金五十萬兩助陵工壬寅御史王
心一劾客氏魏進忠不報二月癸卯朔

大清兵攻香爐山甲辰復召對之典乙巳日暈旁有珥
如月赤白色又如環四面各有形如日化爲青虹如
弓與日相背自辰至午始滅丁未罷漕運總兵官命
禮部選淑女癸丑

大清兵薄奉集堡戊午

大清兵攻虎皮驛尋至王大人屯己未帝御經筵庚午
楊鎬李如楨論死陝西臨洮地震辛未嚴禁左道閏

二月癸酉朔免肅藩貢馬南京吏部尚書沈應文罷
丙子大風霾丁丑荆王助餉己卯京師旱禱雨復遼
東科舉乙酉風霾戒諭羣臣辛卯興天津屯務癸巳
火星逆入氐宿甲午日生交暈左右珥黃白相接白
虹亘天起孫瑋爲南京吏部尚書魏養蒙爲南京戶
部左侍郎兼右僉都御史總督糧儲丙申赦建文臣
齊秦黃子澄戚屬後裔之在戍所者戊戌昭和殿災
加朶顏衛頭目克帖木阿卜米俱指揮僉事海州吳
金祖叛總兵官李光榮擒之辛丑賈繼春削籍陞副
總兵賀世賢爲征彝總兵官三月辛亥大風揚塵四

塞壬子

大清兵入渾河至頭目屯甲寅圍瀋陽乙卯瀋陽破總
兵官尤世功賀世賢死之川浙援兵總兵官陳策童
仲揆裨將周敦吉石柱土司副總兵秦邦屏等並死
之辛酉卹三路陣亡將士劉縱王宣杜松等各贈套
有差壬戌

大清兵破遼陽巡按御史張銓兵備副使何廷魁崔儒
秀都指揮徐國能同知冒日乾等死之經畧袁應泰
自焚死炒花陷長安堡丙寅命舉謀畧出衆者丁卯
海州四衛皆破起熊廷弼爲兵部右侍郎陞四川天

全六番招討使楊愈爲五軍營總兵官協理京營事務庚午發帑金一百萬兩克遼餉夏四月壬申朔日有食之癸酉浚都城濠安南入貢甲戌命總督文球攝經畧事日中有黑氣摩盪將暮赤星見東方以李宗延爲右僉都御史協理戎政乙亥以薛國用爲兵部右侍郎兼右僉都御史經畧遼東是日午刻寧夏洪廣堡風霾大作墜灰如瓜子踰時而止延綏孤山城陷三十丈入地二丈五尺丙子命天津督餉侍郎李長庚回部管事以王化貞爲右僉都御史巡撫廣寧丁丑防海戊寅命分道募兵四川妖僧政坤作亂

擒之壬午山西懷延二衛地震癸未南京工部尚書
丁賓致仕甲申命舉邊才添設職方郎中主事各一
員乙酉逮保定總兵官郭增輝丙戌發帑金十萬兩
築山海邊牆戊子山西開平龍門二衛地震己丑倭
犯彭湖禦却之癸巳逮遼東監軍道牛維曜海蓋道
康若乾等乙未命御史傅宗臯總兵官楊于茂招練
新兵丁酉起王象乾總督九邊涂宗濬提督京陵軍
務戊戌冊張氏爲皇后己亥追卹遼陽死事諸臣張
銓尤世功陳策崔儒秀何廷魁童仲揆吳文傑周敦
吉戚金鄧起龍秦邦屏等各贈廕有差五月壬寅朔

冊王氏良妃段氏純妃御史張捷請罷內操不報甲
辰風霾四塞丙午敕延鎮監市勞賞卜失兔阿不害
等有差丁未黔苗平戊申崔景榮罷以王象乾爲兵
部尚書乙丑宥石星子應奇于戌所戊辰以杭州火
災蠲本年春運織造諭祭遼陽陣亡將吏己巳謫司
禮太監盧受于鳳陽命天下朝覲官各帶兵器交納
六月辛未朔熊廷弼建三方布置之議分遣御史各
處募兵甲戌李光榮革職聽勘乙亥戶部尚書李汝
華致仕以大婚禮成加恩奉聖夫人客氏丙子以熊
廷弼爲兵部尚書兼右副都御史駐扎山海經畧遼

東軍務薊遼總督文球罷辛巳王象乾自請行邊不
允甲申敘貴州征苗功加張鶴鳴兵部尚書輔臣葉
向高等各進秩有差命成山伯王國柱爲南京左府
都督東寧伯焦夢熊爲後府都督誠意伯劉蓋臣爲
右府都督撫寧侯朱國弼以僉書攝中府都督清平
伯吳遵周以僉書攝前府都督改汪應蛟爲戶部尚
書何應祥爲南京工部尚書庚寅火落赤遣使挾賞
加宗室及聖裔中式解額諭留乳母奉聖夫人客氏
于大內癸巳命定西侯蔣承勛爲南京前府都督秋
七月庚子朔給援遼死事石柱宣撫司秦拱明地三

十項壬寅增設遼東各路監軍道癸卯嚴捕逃兵陞
客氏子侯國興爲錦衣衛指揮僉事丁未增置軍器
局戊申卹陣亡軍士庚戌京師旱蝗辛亥賜熊廷弼
尚方劍麒麟服宴都城外百僚陪餞壬子以軍興用
詘免織造三分之一甲寅命王象乾行邊總督薊遼
軍務丁巳以陳薦爲南京刑部尚書魏養蒙爲南京
戶部尚書祁伯裕爲南京右都御史乙丑補敘萬曆
四十二年延綏寧夏固原捕獲功宣捷午門祭告郊
廟八月庚午朔追卹土木死事右都御史鄧縈丙子
王化貞奏鎮江之捷陞叅將毛文龍爲副總兵辛巳

帝御經筵壬午遣郎中梁之垣宣諭朝鮮乙酉土魯
番入貢貴州大水命給奉聖夫人墳地以田爾耕爲
錦衣衛都督同知戊子浙江杭州復火詔停織造癸
巳停刑甲午撤金水河北臺改朝鮮貢道九月壬寅
葬光宗慶陵甲寅中官王昇攔擊協理戎政都御史
李宗延于朝門不問乙卯四川土司奢崇明叛殺巡
撫徐可求等據重慶分兵攻合江納溪破瀘州遂攻
成都僞號大梁己未薊州遵化密雲地震乙丑涂宗
濬卒命黃克纘攝理戎政奉聖夫人出宮隨命傳入
丙寅奢崇明陷遵義丁卯陷興文知縣張振德死之

是月魏進忠殺司禮太監王安冬十月戊辰朔御史
馬鳴起王心一給事中侯震暘倪思輝等並糾客氏
嚴旨誚罰有差改張鶴鳴爲兵部尚書陞饒景暉兵
部左侍郎協理戎政命王三善爲僉都御史巡撫貴
州兼督湖南川東軍務丙子百戶陳有繼請開礦付
詔獄乙酉奢酋圍成都丙戌陝西會寧縣牛產異獸
遍體鱗甲有火光丁亥初經畧熊廷弼議三方布置
主守巡撫王化貞主戰時以鎮江之捷朝議皆石化
貞及鎮江再陷又責廷弼出關廷弼因上四事請樞
臣張鶴鳴預決一事不中制一同心呼吸一無懸度

臆逞一無扶同誇詡詞甚剴切己丑以朱燮元爲右
副都御史巡撫四川辛卯欽延鎮寧夏甘肅功黃嘉
善楊應聘祁伯裕等各進官賜廕有差發帑金二百
萬兩助邊甲午奪禮部主事劉宗周俸以糾內侍魏
進忠也乙未江都妖民武悟空伏誅十一月戊戌朔
遼東舊撫李維翰乙巳陞田爾耕爲錦衣衛右都
督套虜卜失兔等貢馬丙午冬至大祀于南郊丙
寅陞顧秉謙禮部尚書兼翰林院學士仍掌詹事府
事起翁正春爲禮部尚書丁卯吏部尚書周嘉謨乞
歸命盛以弘暫署部事十二月戊辰朔

大清兵屯海州庚午再敘遼潘死事諸臣張神武等贈
廕有差下內官趙昇王受等于獄丁丑以張我績爲
兵部右侍郎兼右僉都御史總督四川貴州軍務兼
制雲南湖廣等處庚辰衛一鳳罷辛巳改張問達爲
吏部尚書是日午刻日上有一物覆壓摩盪怪風揚
沙通天皆赤癸未安南補貢丙戌敘定陵功陞田爾
耕爲左都督庚寅命許世臣鎮守薊永山海蕭如薰
鎮守寧夏白兆慶鎮守延綏魯欽鎮守保定辛卯以
鄒元標爲左都御史

二年春正月己亥慶陵工成廕王體乾魏進忠弟姪

一人錦衣衛指揮僉事廷議經撫去留初王化貞主約西邊諸部助戰與熊廷弼不合科臣侯震陽極論經撫不宜兩存詔廷臣集議兵部請存撫臣以固毛帥之心以用西人經臣別行推用議不決已而化貞之策亦不效己酉山西平陽及諸州縣地皆震辛亥大計天下有司詔于卓異中舉邊才丁巳

大清兵破西平堡副總兵官羅一貫叅將黑雲鶴死之總兵官劉渠祁秉忠等逆戰于沙嶺兵潰及副總兵劉徵俱戰死叅將孫得功以廣寧降王化貞走閭陽遇經畧熊廷弼自右屯援廣寧與監軍高出胡嘉棟

韓初命俱逃入關叅政高邦佐獨留松山死之壬戌
改黃克纘爲兵部尚書協理京營戎政癸亥張鶴鳴
自請視師加太子太保賜蟒玉尚方劍隨行者各進
秩有差命王在晉署兵部事乙丑京師戒嚴停殿工
申保甲法是月成都圍解改魏養蒙爲南京兵部尚
書套虜入延綏焚掠黃花等峪二月戊辰逮高出胡
嘉棟癸酉山東濟南東昌河南汝寧同日地震水西
土同知安邦彥反破畢節安順龍里等處進圍貴陽
卹河西殉難諸臣甲戌月犯天關乙亥月掩井宿丁
丑製戰車賑河西逃難士民命孫承宗爲兵部尚書

兼東閣大學士入閣預機務命楊麒守延綏吳守德
守寧夏李懷信守大同俱充掛印總兵官戊寅燭天
下帶徵錢糧並免直隸加派己卯改王紀爲刑部尚
書逮王化貞褫熊廷弼職回籍聽勘丙戌金星晝見
戊子命解經邦爲兵部右侍郎兼右僉都御史經畧
遼東己丑命孫承宗暫掌兵部事大風霾逮韓初命
壬辰遣官河南買馬刑部主事王之寀追理張差舊
案特糾劉廷元胡士相等不行乙未改陳薦爲南京
戶部尚書王永光爲戶部尚書總督倉場三月丁酉
朔大學士劉一燝罷己亥舉內操辛丑命勲臣募兵

尋罷之甲辰陞王在晉爲兵部尚書兼右副都御史
經畧遼東李長庚爲南京刑部尚書丙午山東歷城
長清濟陰臨邑諸州縣地震三日壞民居無數辛亥
策試天下貢士賜文震孟等四百人進士及第出身
有差戊午京師大捕奸細己未工部尚書王佐罷辛
酉禱雨壬戌河南地震夏四月丙寅朔法司會審王
化貞熊廷弼甲戌以姚思仁爲工部尚書丙子朱變
元復重慶辛巳禮部尚書孫慎行追論方從哲李可
灼進藥之罪詔廷臣會議添註三品京堂官以疏淹
滯癸未罷寶和皇店稅己丑屯田天津壬辰京師大

兩電鄒元標追論方從哲之罪五月戊戌復前大學士張居正官謚予祭建祠四川妖賊白仙臺等伏誅己亥詔卹先臣方孝孺遺嗣壬寅戌逃臣冒日乾甲辰王紀疏劾沈淮不聽釋潘府幽禁老疾罪宗乙巳定逃臣胡嘉棟高出罪李維翰鄭之范論斬丙午山東白蓮教妖賊徐鴻儒反攻陷鄆城丁未雲南巡撫沈儼劾奏水西叛逆戊申山西平陽諸州縣同日地震庚戌大學士葉向高尚書王紀請寬張拱宸等以安中宮不聽山東妖賊攻鉅野知縣趙延慶却之戌逃臣韓初命總兵官楊茂春郭增輝壬子賞効力哈

喇等米布丁巳六科給事中趙時用等合疏糾沈淮
不聽戊午山西太原地震有聲己未山東妖賊攻滋
陽知縣楊炳禦却之庚申括直省存庫銀充餉壬戌
給事中張鵬雲追論劉廷元曲庇張差之罪廷元謫
外癸亥山東妖賊復攻克州楊國棟敗之官兵復重
慶六月丁卯給事中周朝瑞疏劾張鶴鳴與王化貞
同罪不報予方孝孺祭葬並謚戊辰山東妖賊破鄒
滕二縣知縣姬文消死之毛文龍爲平遼總兵官庚
午命恭順侯吳汝濱總督京營戎政妖賊陷夏鎮御
史溫臯謨再劾鄭養性己卯發帑金五十萬築遼東

邊牆卒已奢酋僞總兵張武等就擒僞丞相何芳海等降甲申詔卹建言爭國本諸臣馮應京顧憲成等七十三人復職贈廕有差加成山伯王國柱太子太保給事中汪慶百彭汝楠方有度等追論進藥移宮事請定方從哲李可灼崔文昇罪汝楠坐奪俸丙戌御史徐景濂爲從哲申辨有度復爭之詔廷臣會議於是尚書張問達汪應蛟王紀等言從哲黨庇可灼文昇而給事中沈應時魏大中等執春秋大義責從哲侍郎張經世陳邦瞻列卿蕭近高給事中劉弘化御史劉芳侯恂少卿高攀龍等各疏從哲之罪並不

聽庚寅黃克纘爲從哲申雪尚書王紀給事中薛文
周魏大中等連疏劾之不聽壬辰鄆城鉅野賊平癸
己束鹿肥鄉大水是月朱燮元復瀘州秋七月辛丑
冊慧妃范氏甲辰王紀削籍爲民大學士葉向高疏
爭不聽高攀龍復追理方從哲崔文昇鄭養性罪切
責奪俸淫雨壞山海邊墻妖賊攻曲阜知縣孔聞禮
禦却之己酉發帑金三十萬撫邊辛亥禮部尚書孫
慎行罷壬子沈淮免賑山海二路雨災詔撫集遼民
庚申貴州官兵敗績遵義復陷癸亥畿南紅巾賊于
志弘反討之黃克纘免八月丁卯太僕少卿滿朝薦

追論袁應泰王貞削職爲民乙亥以孫瑋爲刑部
尚書丙子大學士孫承宗自請督師經畧遼東軍務
丁丑武邑妖賊平壬午以顧秉謙爲禮部尚書王在
晉爲南京兵部尚書閻鳴泰爲右僉都御史巡撫遼
東甲申禁百官私交乙酉卹四川死難諸臣九月甲
午朔以董漢儒代張鶴鳴爲兵部尚書改陳薦爲南
京吏部尚書丁酉給事中朱童蒙劾鄒元標馮從吾
鍾羽正京城聚衆講學元標等具疏求罷不允庚子
詔增新兵按地畝起餉己酉以李長庚爲南京戶部
尚書黃汝良爲南京禮部尚書乙卯臨洮地震冊封

皇五弟由檢爲信王詔停刑辛酉演象所災壬戌臨
洮地復震冬十月乙丑以李養正爲南京刑部尚書
壬申雲南官兵恢復霑平詔備紅彝贈袁應泰兵部
尚書給與祭廕山東巡撫趙彥討妖賊奏捷獻俘丁
丑卹殉難副使孫好古川督張我績獻俘己丑左都
御史鄒元標致仕修撰文震孟以建言謫外甲午南
京兵部尚書魏養蒙卒以陳道亨代之是月有龍見
于北花房河中長尺許詔放黑龍潭十一月辛丑以
趙南星爲左都御史房壯麗爲工部右侍郎兼右僉
都御史總理河道甲辰冊封光宗選侍劉氏爲貞靖

賢妃信王生母也癸丑妖賊徐鴻儒等伏誅戊午李
可灼戍邊發帑金五萬賑滇民辛酉以楊述中爲兵
部左侍郎總督貴州軍務朱燮元進兵部右侍郎總
督四川兼制湖廣軍務左副都御史馮從吾罷十二
月癸亥發帑金三十萬兩充黔餉甲子暹羅入貢己
巳詔存卹孟氏子孫修復孟廟辛巳停各衙門添註
官覈四川文武諸臣功罪廢卹勘議有差癸未以何
熊祥爲南京吏部尚書朱光祚爲右副都御史協理
戎政乙酉敕平妖功加趙彥兵部尚書卹廣東死事
將士丙戌南京給事中歐陽調律請修建文實錄並

廟祀下禮部議

三年春正月甲午火星犯房宿壬寅再卹建言散秩
諸臣乙巳山東妖賊平己酉命朱國楨顧秉謙朱延
禧魏廣微俱以禮部尚書兼東閣大學士入閣辦事
紅蕖入彭湖壬子鳳凰集于開封大驄山甲寅月犯
鍵閉星戊午斥鄭養性居遠方二月丁卯山東蓬萊
地震陳必謙再糾鄭養性劉廷元戊辰追卹征妖將
士張榜等五十七人命顧秉謙朱延禧同知經筵日
講並實錄總裁己巳以盛以弘爲禮部尚書兼翰林
院學士改李長春爲戶部尚書陞張輔之爲南京工

部尚書丁丑賜毛文龍尚方劍戊寅暹羅入貢壬午
以鍾羽正爲工部尚書乙酉卹狗難博士孟承光孟
子嗣孫也已丑御史周宗建再劾魏進忠郭鞏貴州
官軍敗績于陸廣起李三才爲南京戶部尚書三月
乙未月犯畢宿丁酉紫荆妖人趙思武聚衆爲亂推
官范紹序擒之以陳大道爲戶部尚書李宗延總督
倉場癸卯松江地震乙巳薊鎮天鼓鳴有星隕大如
車輪火光四燭丙午登萊地震辛亥雲南逆賊祿千
鍾犯尋甸武定曲靖官軍禦却之甲寅銀定入犯擊
敗之禱雨黃梅熊宣等作亂擒之釋南京河南江廣

諸處罪宗丁巳琉球入貢夏四月庚申朔京師地震
丙寅諭各督府選將才戊辰遣官祭孟廟己巳朱國
祚罷辛未兩廣總督胡應台進西洋人練習火器者
戊寅蠲薊州草場租庚辰停三部總理戊子朝鮮國
王李暉爲其姪倬所篡己未添註大理少卿范濟世
請加封李選侍有旨切責既而宥之逮失機總兵杜
文煥五月庚寅朔盛以弘罷壬辰順義王卜失免遣
使入貢己亥御史宋師襄追論劉朝之罪詔捕餘黨
下有司庚子詔選淨身男子一千人河決睢寧以林
堯俞爲禮部尚書兼翰林院學士壬寅熱審慮囚四

川永寧大捷奢崇明父子敗走紅崖六月戊辰詔再
選淨身男子一千人御史劉之鳳請罷內操不許秋
七月辛卯南京大內離宮火奢寅父子敗走龍場賜
遼東死事諸臣祠額己亥大學士史繼偕致仕丁未
鍾羽正罷甲寅廢太監王體乾魏進忠子姪爲錦衣
衛指揮使世襲廷臣爭之不報乙卯何熊祥罷董漢
儒憂去八月己未朔內使王文進毆殺戴進忠刑部
尚書孫瑋請下法司不聽莊士元棄市以王舜鼎爲
工部尚書甲子火星犯南斗乙丑發帑金十萬兩餉
關門丙寅御史胡良機請罷內操不聽廢四川死難

諸臣甲戌趙彥回部理事丁丑四川鎮平堡地震辛
巳命恭順侯吳汝清等清查京營覘申奸人韓宗功
伏誅九月戊子朔余懋衡罷陳道亨致仕癸巳給事
中陳良訓陳言下鎮撫司杖訊大學士葉向高申救
不聽乙未松潘地震南居益回部管事丙申命李宗
延回部甲辰木星犯軒轅乙巳大學士吳道南卒丁
未周應賓罷癸丑吏部尚書張問達致仕冬十月壬
戌給事中方有度疏叅毛文龍袁可立不聽癸亥魏
廣微入直供事甲子再敘平妖功進趙彥太子太保
世襲錦衣衛僉事己巳皇第一子生旋殤給遼陽死

事諸臣謚癸酉以趙南星爲吏部尚書乙亥京師地震丁丑停刑轉漕十萬餉毛文龍己卯皇第二子生辛巳日生重暈暈旁生左右珥甲申夜火星犯壁壘陣閏十月辛卯以蕭雲舉爲禮部尚書乙未湖廣沅陵民家牛生犢一身二首三尾又翫坪溪民家產豕長喙猪身人足隻眼旋斃戊戌以孫瑋爲吏部尚書管都察院左都御史事張經世爲戶部尚書總督倉場己亥宣延綏寧夏甘肅三鎮捷祭告郊廟戊申以毛文龍言建龍王廟於鹿島封顯應王庚戌以李起元爲南京戶部尚書起楊漣爲左僉都御史乙卯雲

南地震四川仁壽縣長山裂聲如雷長七里衝三尺
深不可測十一月丁巳朔冬至親祀天于南郊甲子
以喬允升爲刑部尚書李起元總督三邊甲戌陝西
賽平諸番族貢馬哈喇慎部朗素貴英糾三十六家
挾賞謀犯中右所叅將王楹遇伏死之陝西鳳縣大
鼠有肉翅飛而害稼割其腹得粟一升朝鮮入貢楊
述中免乙酉錄貴州討賊功右都御史朱燮元等進
秩有差十二月丙戌朔秦寧三衛貢馬乙丑金星晝
見戊戌京師地震陝西韓城妖人劉買得作亂擒之
丁未南直應天蘇松鳳泗淮揚滁等處同日地震己

酉停推薊遼總督歸併經畧庚戌太監魏進忠賜名
忠賢提督東廠乙卯黎惟祺襲安南都統使

四年春正月丙辰朔長興民吳野樵作亂殺知縣石
有恒主簿徐可行戊午王三善師潰三善及監軍岳
其仰副將秦明屏等並死之庚申天津三衛地震有
聲川師入龍場獲逆酋奢崇明及僞官蔡金貴等丁
卯以馮從吾爲南京右都御史大學士葉向高請復
添註以廣起用從之己巳何宗彥卒癸酉上芭籬番
人貢馬及方物乙亥左副都御史喬應甲劾奏東林
黨魁李三才借黃正賓汪文言交通趙南星高攀龍

等力爲援引帝是之丁丑妖人王好賢伏誅蘇州府
同知楊姜忤織造太監李實削籍巡撫周啓元發實
侵漁違禁諸罪不報葉向高請召還文震孟等不聽
裁施歸兵備僉事癸未日有黑子相盪凡四日二
月辛卯張輔之致仕壬辰張經世致仕丙申御經筵
夜月犯軒轅丁酉以右僉都御史沈儆忤爲南京工
部尚書薊州永平山海地屢震壞城郭廬舍無算免
川廣閩浙香貢命朱燮元處置蘭首故地丁未以風
霾馳諭邊臣己酉以緝捕功進錦衣衛田爾耕少保
兼太子太保壬子日黃無光甲寅京師地震宮殿動

搖有聲樂亭地裂湧水尺餘三月乙卯朔王象乾以
母憂歸復以吳用先爲薊遼總督丙辰京師地震戊
午夜京師地再震庚申夜復震者三丙子進田爾耕
少傅兼太子太傅是月杭州兵變廢太監魏忠賢弟
爲錦衣百戶夏四月丙戌榆林衛民家生豕一首二
身二尾八足命蔡復一總督雲貴湖廣軍務兼巡撫
貴州妖民金科馬永等伏誅乙巳陽曲榆次地震給
事中傅樞誣奏魏大中左光斗與汪文言罪狀詔下
文言鎮撫司嚴訊戊申工部尚書王舜鼎卒敏禦妖
功進李養正太子少保五月甲寅朔福寧州軍變命

封爵糾掌北鎮撫司理刑乙卯內傳賜毛文龍金蟒
壬戌禱雨增鹽課癸亥乾清宮東輝旋風驟起吹內
官監大鐵片盤旋若紙墜於西輝聲若轟雷甲子沈
淮卒敘貴州復城功丁卯孫承宗求去舉趙彥自代
不許己卯夜有流星如蓋大青白色自壁入天倉二
小星隨之固原華亭大雨雹塞上大旱六月癸未朔
左副都御史楊漣劾魏忠賢二十四大罪帝不問甲
申忠賢辭東廠乞罷溫旨慰留魏廣微所擬也丁酉
給事中傅樞陳良訓御史張訥各疏攻趙南星左光
斗魏大中鄒維璉等丙申通州新兵譁保定地震己

丑給事中魏大中等劾魏忠賢客氏傳繼教傳應星
之罪帝怒命下大中詔獄葉向高救之乃寢癸巳午
刻南方五色雲見太僕少卿朱欽相給事中許譽卿
劉懋御史李應昇合疏糾魏忠賢詹事府禮部尚書
翁正春給事中熊奮渭朱大典陳奇瑜吳弘業霍守
典孫紹統楊維新御史劉璞劉芳房可壯洪如鍾李
喬崙郎中郝維璉等各疏糾魏忠賢俱不聽丙申大
雨雹皇子慈煇薨內侍騎馬入禁門毆傷衛士巡視
科臣杜三策劾奏置不問大學士葉向高疏請忠賢
自罷並乞罷內操不許魏忠賢矯詔杖殺工部屯田

司郎中萬燝戊戌撫寧侯朱國弼劾魏忠賢命閒住
奪俸三年錦衣衛逮其書奏舍人于獄壬辰逮杖巡
城御史林汝翥霍州高時正家生豕二身二眼象鼻
四耳四乳尚書趙彥等合疏請退忠賢不聽甲辰命
王守謙諭留孫承宗丁未朱爰元俘僞都督李遠達
等至京卹大方陣亡將吏江南大水秋七月癸丑朔
蘭首奢史都等伏誅紅藥通倭寇福建禦之辛丑大
學士葉向高罷以朱光祚爲工部尚書總理河道南
師仲爲南京禮部尚書癸亥六科廊火南京給事中
楊棟朝劾奏魏忠賢搜括南都之害御史李應昇爲

杖死萬燦訟冤黃尊素王振奇杜三策周洪謨萬言
揚疏繼上有旨報聞御史劉廷佐請誅忠賢不報詔
進大學衍義補給事中劉懋請罷內操不報河決徐
州山東饑命賑之八月甲午左都御史孫瑋卒貴州
兵克岩頭寨宣大備邊耕籍田廣順天鄉試額申明
輿服之禁南京兵部尚書陳道亨侍郎岳元聲等合
疏請去魏忠賢祭酒蔡毅中率合監師生千餘人請
究忠賢二十四大罪以遵祖訓皆不聽癸卯以高攀
龍爲左都御史辛亥以李維楨爲南京禮部尚書九
月庚申高攀龍劾兩淮巡鹽御史崔呈秀貪污命奪

秩聽勘庚辰以馮從吾爲工部尚書冬十月乙酉以
曹于汴爲南京右都御史辛卯玉璽見于漳濱丁酉
趙南星罷命官諭留魏廣微己亥高攀龍罷福建官
兵破走紅彝十一月辛亥朔署吏部事右侍郎陳于
廷左副都御史楊漣左僉都御史左光斗削籍爲民
起崔景榮爲吏部尚書李宗延以吏部尚書掌都察
院事前大學士朱國祚卒己巳大學士韓爌罷十二
月辛巳朔復逮汪文言召還賈繼春徐景濂王志道
從御史梁夢環請也兩當民變殺知縣牛得用加朱
變元兵部尚書以周希聖爲南京戶部尚書丙申削

趙南星籍大學士朱國禎罷李維禎引疾致仕喬允升罷以黃克纘爲刑部尚書癸卯南京地震如雷

五年春正月庚戌朔木星犯太微垣左執法辛亥崔呈秀復官辛酉諭江南重災地方漕糧改折三分之一浙江帶運糧米暫折一年甲子貴州巡按傅宗龍請暫停武舉專勵戰勇拔真才以收實用從之壬申命李蕃管理章奏癸酉卹貴州死難諸臣徐朝綱孫克恕王昌胤等贈廕有差乙亥起李養正爲刑部尚書以董其昌爲南京禮部尚書禮部左侍郎協理詹事府事何如寵冠帶閒住太僕寺卿劉宗周革職追

奪誥命丁丑弊諭毛文龍戊寅慶陵成孫承宗加少
師兼太子太師兵部尚書顧秉謙朱延禧加少傅兼
太子太傅吏部尚書俱建極殿大學士廕中書舍人
舊輔葉向高加上柱國廕尚寶司丞朱國禎加少師
兼太子太師吏部尚書建極殿大學士廕中書舍人
太監魏忠賢廕錦衣衛都督同知其餘王體乾等各
陞廕有差曹于汴辭免南京右都御史新命許之南
京兵部尚書陳道亨罷喬應甲劾李三才及張問達
趙南星高攀龍曹于汴等疏凡十上俱下所司發帑
金十萬兩充黔餉是月白菱湖奸民楊桓等聚衆倡

亂擒之二月庚辰朔以陵工加林堯俞太子太保壬午湖廣山東江西福建主考官方逢年熊奮渭丁乾學顧錫疇等以策問語含譏刺並降調乙酉命顧秉謙魏廣微爲會試主考大理寺丞徐大化攻趙南星孫愼行並追論移官與汪文言罪案遂命錄用何熊祥王永光申用懋朱一桂陸卿榮王伉秦聚奎汪慶百徐揚先郭鞏劉廷宣邵輔忠姚宗文范得志丙戌更換朝鼓己丑余懋衡疏辭南京吏部尚書新命許之戊戌月掩氏宿東北星甲辰朱光祚罷乙巳逮戚臣李承恩下鎮撫司獄魏忠賢誣其擅用御物也刑

部右侍郎王之寀削籍追奪誥命丁未命兵部侍郎
董象恒賁勅命圖書給西番喇嘛僧楊炳勅順天巡
撫鄧漢賄結汪文言並糾何棟如漢降調棟如逮問
命太監王敏政胡良輔冊封朝鮮戊申

大清兵破旅順遊擊張盤都司朱國昌死之三月辛亥
工部主事曹欽程劾東林黨魁周宗建張慎言李應
昇黃尊素薦傅樾陳九疇李魯生梁夢環張惟一等
十人宗建等削籍逮問壬子柳佐卒癸丑起王在晉
爲南京吏部尚書王永光爲南京兵部尚書改畢自
嚴爲南京右都御史甲寅帝幸太學乙卯加魏忠賢

弟姪官一級以緝獲李承恩功也丁巳詔革冗官林
學曾罷下游士任千鎮撫司李仙品回籍聽勘庚申
命議樞輔去留辛酉戶部侍郎陳所學罷壬戌魯欽
等深入水西兵潰癸亥策試天下貢士賜余煌等三
百人進士及第出身有差甲子起文球爲兵部侍郎
兼右僉都御史協理京營戎政甘肅巡撫李若星削
職爲民追奪誥命褒魏忠賢修肅寧城功廕錦衣衛
都督僉事仍於本地建坊旌表從崔呈秀請也丙寅
命沐啓元襲祖爵充總兵官鎮守雲南戊辰下許念
敬鎮撫司與汪文言一併勘問薊遼總督吳用先冠

帶開任甲戌蔡復一免命朱變元兼督貴州以李長
庚爲戶部尚書兼右副都御史督理糧餉巡撫天津
丁丑北鎮撫司許顯純勘問汪文言奏逮楊漣左光
斗袁化中魏大中周朝瑞顧大章又誣奏趙南星王
之寀熊明遇惠世揚毛士龍繆昌期黃正賓鄧漢李
若星等受賄之罪並行撫按勘問追贓法司會勘李
承恩夏四月辛巳汪文言死於北鎮撫司癸未金星
晝見丙戌開鼓鑄于荊州丁亥給事中霍維華追論
紅丸移宮一案誣奏劉一璟韓爌周嘉謨張問達孫
慎行之罪命毀監生楊惟休私刻秦昌日錄己丑宥

李可灼回籍加舊輔沈一貫太師癸巳裁山海管糧
通判起王之臣兵部右侍郎總督薊遼何士晉削籍
己亥削劉一燝籍養馬當差高攀龍奪職爲民起范
濟世爲南京都察院右僉都御史提督操江庚子熱
審慮囚以緝獲武元吉功廕魏忠賢弟姪一人都督
僉事丙午發中宮及諸王公主助銀四十萬兩于邊
五月戊申朔逮前御史方震孺蔡毅中宋槃致仕己
酉趙彥罷庚戌韓光祐罷贈沈淮太保仍予謚岳駿
聲追論張差命鄭養性回京居住下袁化中北鎮撫
司究問丁巳翁正春罷己未以施鳳來錢龍錫丁紹

載李康先李標吳宗達充實錄副總裁癸亥楊所修
官擬擊紅丸移宮三案宜倣明倫大典成書以示天
下甲子趙彥張問達周嘉謨削籍乙丑帝祀北郊回
廷拜西苑溺于水以救得免溺死幼璫二人丙寅前
禮部尚書王圖開任庚午行宗室限祿法白所知罷
以魏忠賢姪魏良卿僉書南鎮撫司徐光啓罷壬申
以高第爲兵部尚書下顧大章北鎮撫司究問六月
丁丑朔延安大風雪三日是歲大饑人相食戊寅蕭
雲舉罷翟鳳耕削籍聽勘庚辰濟南飛蝗蔽天秋禾
傷盡卒已余文燭疏叅葉向高陳一元陳長祚一元

削籍田景新糾次輔朱延禧壬午張鳳翔罷丙戌朱
延禧罷岳元聲回籍聽勘姚希孟削籍起黃汝良爲
禮部尚書兼翰林院學士掌詹事府周如磐爲禮部
尚書兼翰林院學士協理府事以王紹徽爲左副都
御史己丑下左光斗北鎮撫司究問庚寅鄖陽巡撫
畢茂康前吏部左侍郎李騰芳削籍辛卯下魏大中
北鎮撫司究問甲午太監韓世祿劾高陽知縣唐紹
堯緹騎逮之丁酉王圖程正己趙昌運彭遵古李日
宣程國祥削籍當差陞魏忠賢甥楊六奇爲錦衣衛
同知朱光祚削職爲民癸卯下楊漣北鎮撫司究問

秋七月丁未朔滇南始開鼓鑄戊申胡應台罷庚戌
方震稱下刑部獄諭鎮撫司逐日追比楊漣左光斗
等賊丁巳遣鴻臚官宣諭魏廣微入閣辦事戊午金
星晝見辛酉御史倪文煥劾李邦華李日宣周順昌
林喬枝等並請碎講學之碑庚午韓策汪先岸追奪
誥命何棟如謫戌崔景榮罷以李宗延爲吏部尚書
壬申削前大學士韓爌籍楊漣左光斗死于北鎮撫
司被察御史康丕揚追論楚事妖書請定郭正域罪
下廷臣詳議甲戌魏大中死于北鎮撫司命嚴追袁
化中等賊八月丁丑朔追奪李三才顧憲成曹于汴

詔命御史石三畏追論辛亥丁巳癸亥三京察疏稱
邪臣李三才顧憲成王圖孫丕揚曹于汴胡忻王元
翰王淑忭湯北京王宗賢趙南星張問達王允成涂
一榛王象春等十五人並削籍當差追奪詔命平遼
總兵毛文龍疏頌冊封朝鮮太監王敏政胡良輔御
史張訥奏毀天下書院削奪鄒元標孫慎行馮從吾
余懋衡官詔甲申以緝獲蔣應陽功加魏忠賢弟姪
爵二級戊子諭內閣曰朕自去歲屏逐兇邪廓清朝
宇勵精圖治雅意中興秉軸大臣莫有爲朕分憂共
念者卽如楊漣左光斗移宮一事背先帝之深恩陷

朕躬于不孝又能廷弼等喪師辱國寸斬尚有餘辜而楊漣左光斗等受其重賄巧爲出脫天地不容神人共憤在朝文武持祿養交徇私避禍但顧子孫之計不圖社稷之安朕方率循舊章而曰朝政日亂朕方祖述堯舜而曰大不相侔以致言官承望風旨緘口結舌無有敢直言其罪者今宜改過自新共維國是如有陰懷觀望借題報讐或捏寫蜚書希圖翻案者朕按祖宗所立紅牌之律治以說謊欺君之罪必不食言命周如磐丁紹軾黃立極爲禮部尚書馮銓爲禮部右侍郎並兼東閣大學士入閣辦事乙未袁

化中死于北鎮撫司丁酉蔣應陽棄市以王紹徽爲
左都御史徐大化爲副都御史吳宗禮爲南京刑部
尚書己亥魏廣微回籍林堯俞罷壬寅殺遼東經畧
兵部尚書熊廷弼傳首九邊九月丁未周朝瑞死于
北鎮撫司以呂兆熊爲戶部尚書總督倉場壬子遼
師敗于錦州副總兵魯之甲死之甲寅以弘政宣治
門工成加恩內閣及太監王體乾魏忠賢李永貞等
廕弟姪一人錦衣衛指揮僉事加賞忠賢白金表裏
廕弟姪一人都督同知給與誥命以楊左獄詞頒示
天下崔景榮李孔度削籍夏之令逮問戊午周道登

削籍辛酉霍維華請開採雲霧山以佐殿工戊辰以
葉從心爲工部尚書冬十月丙子朔皇第三子生甲
申准民間俊秀納銀入學召兵部尚書高第經畧遼
東乙酉康丕揚遣戍丙戌土星犯太微垣上將戊子
月犯畢宿大星庚寅大學士孫承宗罷辛卯改王在
晉爲兵部尚書壬辰朱世守楊一鵬劉策陸完學俱
削籍甲午逮中書舍人吳懷賢下鎮撫司獄戊戌陞
許弘綱爲南京兵部尚書十一月己酉逮揚州知府
劉鐸辛亥停南都解茶壬子大學士周如磐罷陳熙
昌陳子壯俱削籍熊明遇提問追贓乙卯刑部獄房

火廕魏忠賢族叔志德右軍都督府僉事丁卯大祀
天子南郊喬允升冠帶閒住甲戌嘉獎田爾耕蔡復
一卒于軍革錦衣衛南鎮撫司掌司事指揮同知張
道濬回籍十二月乙亥朔榜示東林黨人姓名刊布
海內癸未李宗延罷李養正乞休許之命吏部左侍
郎徐兆魁署吏部事協理部事刑部尚書周應秋署
刑部事乙酉禮部尚書薛三省罷丙戌以緝獲功廕
魏忠賢甥傅應星左都督戊子趙南星遣戌以王紹
徽爲吏部尚書開鼓鑄于關中太常寺添註少卿阮
大鍼疏薦謝陞傅魁命吏部議覆御史王珙頌魏忠

賢籌國緝奸之功優詔答之方失任提問追賊練國
事李玄王祚昌霍鏌楊新期談自省等削籍以緝獲
功陞魏忠賢族弟希孔都督同知予傳應星父尚才
母魏氏祭六壇加祭一壇仍命速建坊以旌母節辛
丑御史吳裕中糾丁紹軾廷杖削籍改周應秋爲左
都御史壬寅黃克纘罷董其昌致仕甲辰賑河間饑
六年春正月庚戌

大清兵近石屯甲寅諭吏部都察院速追王之案周宗
建張慎言熊明遇方大任及陶朗先楊漣左光斗顧
大章贓銀以助大工丙辰以徐兆魁爲刑部尚書戊

午命纂三朝要典以顧秉謙可紹軾黃立極馮銓爲
總裁官甲子以李思誠爲禮部尚書丁卯

大清兵營大凌河戊辰大風揚塵四塞庚午

大清兵圍寧遠辛未寧遠圍解夏之令死于北鎮撫司
以喬應甲爲南京右都御史二月甲戌朔嚴逃兵之
禁乙亥加袁崇煥都察院右僉都御史專理軍務仍
駐劄寧遠毛文龍請釋王化貞切責之丁丑西部入
犯平川三山禦却之己卯周應秋請嚴追楊漣左光
斗等賊庚辰月掩畢宿太星以來宗道爲南京禮部
尚書甲申大學士周如磐卒己丑惠世揚論死大風

揚塵四塞庚寅周應賓卒壬辰崔呈秀頌魏忠賢觸
事懷忠請宣付史館從之起張鶴鳴爲南京兵部尚
書癸巳大風揚塵四塞乙未鹵簿大駕工成魏忠賢
廢弟姪一人都督僉事丙申錄四川殉難諸臣後戊
戌蘇杭織造太監李實劾前應天巡撫周啓元並周
順昌高攀龍李應昇周宗建繆昌期黃尊素等俱遣
緹騎逮之袁崇煥奪情視事己亥帝親祭朝日壇庚
子大風揚塵四塞三月丙午高第罷命總兵官滿桂
鎮守寧遠丁未設各鎮監軍內監以緝獲武長春功
封魏忠賢姪良卿爲肅寧伯予告劾世襲吏部尚書

王紹嶽請贈魏良卿四代誥命並及忠賢祖父從之
命袁崇煥巡撫遼東方震孺論死庚申區大倫削籍
陰霾如雨成基命冠帶閒住以劉廷元爲都察院左
副都御史蘇州民變擊死逮周順昌旗校甲子命王
之臣爲兵部尚書兼都察院右副都御史經畧遼東
閻鳴泰總督薊遼丙寅姜逢元冠帶閒住夏四月癸
酉朔以緝獲盜賊功陞魏忠賢弟姪都督同知仍賜
勅獎諭熊明遇遣戍賜魏良卿第宅朝房黃龍光鄧
漢鄒維璉徐良彥遣戍乙亥遣官分取花石丁丑諭
括各路銀助工辛巳前兵部尚書黃嘉善卒海寇林

七老等合紅彝作亂官軍討平之癸未下繆昌期北
鎮撫司獄丙戌高攀龍赴水死崔呈秀陳要典之原
優詔答之癸巳以崔呈秀爲工部侍郎兼都察院左
副都御史是日白露著樹如垂綿日中不散戊戌大
學士丁紹軾暴卒頒肅寧伯鐵券庚子下周順昌北
鎮撫司獄南御史張繼孟削職提問追贓、、、
、、、五月癸卯朔董可威罷丙
午繆昌期死于北鎮撫司戊申京師王恭廠災焚死
軍民無算是日薊門地震密雲地震有聲如雷凡三
日毛士龍黃正賓遣戍姜志禮削籍爲民癸亥朝天

宮災甲子以薛鳳翔爲工部尚書登萊巡撫武之望
疏劾毛文龍跋扈戊辰賜肅寧伯魏良卿莊田七百
頃六月丙子京師地震天津三衛宣大連震山東濟
東二府河南一州六縣皆震傷軍民無算丁丑皇子
薨給魏忠賢三代祭葬誥命陳一敬棄市武長春所
拔也丙戌霧重如雨戊子周順昌周宗建死于北鎮
撫司河南盧氏奸民李宗善等聚衆爲亂官兵擊擒
之庚寅大學士顧秉謙等進三朝要典賞賚有差閏
六月辛丑御史陳朝輔疏劾馮銓不聽浙江巡撫潘
汝楨爲魏忠賢首建生祠黃尊素死于北鎮撫司壬

寅陳朝輔再糾馮銓命銓回籍聽勘丁未以倡議獨
免鋪墊賜勅獎諭魏忠賢逮吳養春改前總兵滿桂
爲中府僉書己酉李應昇死于北鎮撫司以朱一桂
爲南京右都御史壬子月犯天江陞閔夢得爲兵部
右侍郎兼右僉都御史總理五省兵馬錢糧乙卯月
食陰雲不見毛文龍僞報軍功辛酉下周起元北鎮
撫司獄陞馮三元爲都察院右僉都御史協理院事
壬戌中府草場火殺蘇州義士顏佩章馬傑沈揚楊
念如周文元五人王紹徽罷李若星遣戍秋七月辛
未朔日食陰雲不見河南地震癸酉停雲霧山採木

命滿桂鎮守山海關兼轄四路以周應秋爲吏部尚書王永光罷乙亥畿輔地震辛巳寧夏地震命馮嘉會回部管事以薛貞爲刑部尚書殺揚州知府劉鐸以房壯麗爲左都御史丙戌以禮部左侍郎施鳳來右侍郎張瑞圖詹事府詹事李國楨俱爲禮部尚書兼東閣大學士入閣同首輔顧秉謙辦事李啓元致仕己丑月犯畢宿山西靈丘地震辛卯以郭允厚爲戶部尚書蘇茂相爲戶部尚書總督倉場安南遣使入貢乙未以崔呈秀爲工部尚書兼左副都御史督察大工如故八月庚子朔黃汝良致仕庚戌錦衣衛

指揮王國興論死新城伯昇子也癸丑以賂從宇爲
禮部尚書兼翰林院學士掌詹事府事吳崇禮罷辛
酉琉球入貢九月甲戌福建地震毛文龍稱病乞罷
不允戊寅增設關外餉司己卯徐如珂朱欽相削籍
辛巳以靳于中爲南京刑部尚書錢龍錫倪思輝削
籍周啓元死于北鎮撫司癸未金星晝見庚寅顧秉
謙罷甲午皇極殿成帝御殿受賀忽聲如怒濤自殿
中出羣臣班亂前左都御史李誌卒捕皇親張國紀
家人下詔獄魏良卿進肅寧侯改給誥券冬十月庚
子朔詔加魏良卿土田三百頃孝陵衛指揮李三才

爲魏忠賢建祠賜額曰溥仁戊申晉魏忠賢爲上公
加恩三等魏良卿爲寧國公世襲錫之誥券祿米視
魏國公例歲支五千石所賜莊田再加一千頃以示
眷酬癸丑改修光宗實錄從劉廷元請也甲寅以殿
主加恩輔臣及部院卿寺各進秩有差己未順天府
丞劉志選疏叅張國紀御史梁夢環繼之希忠賢旨
也毀江西南昌各書院田土變價以助大工壬戌工
部尚書薛貞請加忠賢第宅命再給三萬五千兩以
示優禮元臣至意吏部尚書周應秋請再敎殿工十
一月乙亥畢自嚴罷戊寅以修理孝陵功加恩魏忠

賢三等廕子姪一人錦衣衛指揮僉事世襲丁亥南京地震庚寅賜魏良卿鐵券表可立致仕以劉廷元爲南京兵部尚書閔洪學爲南京右都御史癸巳以甘鎮捷加恩魏忠賢三等廕弟姪一人錦衣衛指揮使世襲逮房可壯楊嘉祚追賊十二月己亥朔魏忠賢彙奏東廠三年緝獲功廕弟姪一人錦衣衛指揮使世襲楊寰孫雲鶴許顯純俱加太子太保辛丑以山海工成廕忠賢族姪希聖錦衣衛指揮同知復以秋防敏廕忠賢甥孫馮繼先錦衣衛指揮同知戊申南京地震以范濟世爲南京工部尚書辛酉命張鶴

鳴爲兵部尚書兼都察院右都御史總督川貴滇廣
軍務巡撫貴州偏沅以商周祚爲南京工部尚書癸
亥給田爾耕孫繼華指揮僉事全俸時年方二歲潯
州六斗窠賊胡扶紀等作亂殺守備綦人龍把總鄭
養等戊辰李思誠削籍

七年春正月乙亥命秉筆太監涂文輔總督太倉銀
庫崔文昇總督漕運河道李明道提督通倉魏忠賢
助餉廕弟姪一人錦衣衛指揮使世襲辛巳月犯軒
轅火星甲申雲南定邊縣風雷電霧橫漲漂沒鎮姚
所石屏雲龍二州俱地震千崖宣撫司火星飛隕戊

哥南京地震漢寅信王疏辭景府地租銀兩從之辛
卯徐縉芳遣戌二月己亥王之臣罷庚子信王出府
成婚甲辰命總督天津太監胡良輔等移鎮皮島丙
午敘寧遠修城功廕魏忠賢弟姪一人錦衣衛指揮
使世襲丁未賜寧國公魏良卿肩輿逮遵化道耿如
杞丁巳桂瑞惠三王之國陞劉志選爲南京都察院
右僉都御史提督操江己未以史永安爲兵部左侍
郎兼都察院右僉都御史總督三邊三月辛未

大清兵圍鐵山壬申豐城侯李承祚奏開採珠池銅礦

戊寅

大清兵入安州攻黃山堡丁亥以韓日纘爲南京禮部

尚書戊子

大清兵攻朝鮮庚寅命魏忠賢所廢指揮使改尚寶寺
丞夏四月丁酉朔銀定矮木諸部犯邊擊却之下王
之案于北鎮撫司己亥馮嘉會卒以王之臣爲兵部
尚書辛丑煖泉等部入犯禦却之擒獲阿班歹等功
魏忠賢欲廢辛亥程正己遣戍壬子以隆德殿工成
廢魏忠賢第姪一人爲指揮使癸丑王之案死于北
鎮撫司李宗延卒范濟世罷以張樸爲南京戶部尚
書五月丙寅朔詔慮囚乙亥安南入貢辛巳

大清兵圍錦州壬午封銀礦洞口以三藩役竣廢魏忠賢弟姪一人爲錦衣衛指揮使陞張曉爲兵部尚書兼右副都御史總督宣太山西等處軍務時插漢諸部入犯總兵官姚世卿撫之遂受款乙酉命戶部開會計局清天下賦役冊及九邊兵籍丙戌

大清兵圍鐵山錦州圍解甲午開濮餘孽鄭江等復作亂官軍擊平之六月

大清兵攻寧遠海寇一官老犯福建銅山等處秋七月乙丑朔帝不豫丙寅袁崇煥罷己巳申禁鄉會試錄文不得詆毀朝政癸酉帝不豫乙卯封魏忠賢孫鵬

翼爲安平伯加少師歲祿二千一百石賜誥券鵬翼
甫四歲壬午孫慎行謫戍賜魏鵬翼土田七百頃刑
部尚書薛貞以高攀龍子世儒不能防閑其父之死
戍之移內市于元武門八月甲午朔豐城侯李承祚
頃魏忠賢功請比徐中山王例封兩公下兵部議丙
申霍維華奏寧國公魏良卿應累加太師尚有餘級
詔歲增祿米三百石仍給誥券以彰優禮元勲至意
戊戌三殿告成予魏忠賢弟姪二人侯爵世襲大學
士黃立極等各進官有差傳陞崔呈秀爲兵部尚書
仍兼都察院左都御史庚戌以崔凝秀充總兵官鎮

守浙江乙巳召見閣部科道官于乾清宮諭以魏忠
賢主體乾格謹忠貞可與商確大事與學士黃立極
等對曰陛下任賢勿貳諸臣敢不仰體帝悅再敘殿
丘封魏忠賢姪良棟爲東安伯賜予如鵬翼餘各陞
賞有差是年薊遼總督閻鳴泰順天巡撫劉詔巡按
御史倪文煥梁夢環請建魏忠賢祠于西協賜名崇
功工部商人建于京師曰崇仁于通州曰懷德太僕
寺少卿何宗聖建于房山曰顯德薊遼總督閻鳴泰
巡撫袁崇煥建于寧前曰懋德宣大總督張樸巡撫
曹爾楨巡按劉弘光建于五臺山曰報功建于太和

山曰昭德太監劉應坤建于山海曰懋德李若琳建
于蕃育署曰感恩薛世昌建于松江曰德馨宣府巡
撫秦士文建于宣府曰隆勳總督張樸再建于宣大
曰德勳建于鳳陽曰旌德建于建昌曰崇德工部郎
中曾國楨建于盧溝橋曰隆恩監生陸萬齡請建于
國學春秋祀通政司經歷孫如測建于宣武門外曰
懋勳巡綏巡撫朱童蒙建于本鎮曰祝恩武清侯李
銘建于崇文門外曰鴻勳總督保定侯梁世勳建于
安定門外曰著愛工部侍郎盧大受建于京師總督
閻鳴泰建于景忠山曰廣恩登萊巡撫李嵩巡按李

精白建于泰山曰隆熹並嶽又寧海祠曰景仁蓬萊
閻祠曰流鴻總督遼餉戶部尚書黃運泰保定巡撫
張鳳翼提督學政李蕃巡按倪文煥建于河間曰仰
德建于天津曰感仁太監萬九思建于宣大曰嘉猷
上林苑監丞張永祚各建三祠曰存仁曰洽恩曰永
思五軍都督府等衙門建于京師曰德芳曰茂勳河
南巡撫郭增光巡按鮑奇謨建于開封曰載德江北
曰瞻德巡撫張鳳翼建于真定曰旌勳大同巡撫張
翼明建于赤城曰崇功總河侍郎李從心漕運侍郎
郭尚友等建于濟寧曰表勳巡鹽御史許其孝建于

揚州一曰瞻恩一曰流恩湖廣巡撫姚宗文郎陽巡撫梁應澤巡按溫臯謨建于武昌曰隆仁承天曰弘惠均州曰載恩總督三邊史永安巡撫胡廷美巡按莊謙建于太白山曰懋彝楚主華奎建于高觀山鳳皇嶺之陽亦曰隆仁直隸提學御史李蕃再建于河間題曰九千歲山西巡按李燦然會同巡撫牟志夔建于河東曰褒勳福府承奉建于雒陽蘇州巡撫建于虎丘皆欽賜題額甲寅帝大漸傳諭肆赦二十二日乙卯崩于乾清宮壽二十三遺詔以皇五弟信王嗣皇帝位十月庚子上尊諡曰達天闡道敦孝篤友

章文襄武靖穆莊勤愬皇帝崇禎元年三月葬德陵
論曰宦官之禍抑何其甚哉明自中葉政在內璫漸
積蔓延以至于是漢唐而降固未有若斯之酷烈者
也羣小肆毒正類一空人之云亡邦家殄瘁土崩鼎
沸之勢寧待乾綱解紐之日而後知之哉撫卷興悲
能無浩歎